

Li p'tit Gusse, plin d' coradje , aus tchamps avou lès vatches
Di s' pa, aveut l' timps long, i s'embêteut, mièrseû.
I n' fieut nin là trop tchôd ; po s' richandi, i satche
Tant qu'i pout su s' grosse pupe come on vî malureûs.
L'a.an mostère si nez ; p'tit à p'tit, l' mwaîs vint d' chwache
Vint anoncî dès djoûs pus coûts, crus èt pèneûs.
Li gârde, c'èst Pière qu'on lome co bin "Molin à chwaches"
– Pace qu'i tchafîye voltîy, èt mwints côps li tot seû –
Nosse Pière mousse foû do bwès, èfoufyî come one pouye
Qu'a pièrdu s'-t-ou : « Tènoz, quî vola quî ! » di-st-i
Au vatchî tot sbaré, stauré su s' moncia d' fouyes ;
« Vos m' duvrîz rinde sèrvice. Alez, m' fi, fioz m' plaîji !
Dji su r'naté rwèd mwât, odé, à coût d'alin.ne :
Pa deûs côps, dj'a tiré èt raté on chèvreû !
Ça fait dès-eûres qui dj' cour, mins ç' côp ci, faut qui dj' frin.ne.
– Djè l'a vèyu passer, i chaletèut ! Bin-astcheût !
Dji veu qui v's-èstoz scran, r'pwasez vos, purdoz m' place !
Dji m' va mète à sès trouses, dji m' vos l' va achèver !
– Tènoz, purdoz m' fusik, èt po fé pîre qui fwace,
Qui m' tchin vaue avou vos ! Sultan a on fin nez. »
Èt là l' Gusse, tot tchôd-tchôd, èt fiér qui s'aprestéye :
D'on lan, kèrdjî l' fusik, cryî après Sultan
Qu'on n' dîreut nin, à l' veûy, on tchin qui s'èpoltéye :
« C'èst ça, one vîye di tchin ! » sondje-t-i en djèmichant.
I mousse o bwès po r'bate lès bouchons èt lès spènes ;
I sint, i court, i djoke ; tot d'on côp, là l' chèvreû !
Gusse, su dès tchôdès breûjes, i s' fout d' conter matènes :
I tire ! Li côp arive su l' pôle tchin tot pitieûs
Qui rècourt addé s' maîsse lî rèclamer s' manôye :
I ronfèle come on' andje do ciél en sorîyant.
Dès vatches ? I-gn-a pupont ! Èlle on bizé èvôye ;
On l's-aurè v'nu scroter come po rîre, en djouwant.
Nosse Gusse è-st-au r'pintant, disbautchî, près' à braîre ;
Il a yeû bau cachî au diâle èt co pus lon,
I va ruv'nu sins vatches, èt raconter s'-t-afaîre
À s' pa què lî va foute one danse di pèrmission.
Mins cit-ome là, c'èsteûve on pére fwât raîsonâbe ;
Il aveut stî roufion, i n' l'aveut nin rovî :
« Chake si mèstî, s'on vout, contraîremint aus-Arâbes,
Qui lès pourcias fuchenuche bin traîtîs, bin sognîs ! »

Albert Delvaux

Nôvembe 2014

Molin à chwaches : bavard

Fé pîre qui fwace : utiliser toutes ses forces

Conter matènes : donner des détails

Rèclamer s' manôye : exiger des explications